



Tuanju Canselor Mahu Graduan UPM Jadi Rebutan



SERDANG, 15 Okt – Tuanju Canselor Universiti Putra Malaysia (UPM), Sultan Sharafuddin Idris Shah bercita-cita melihat graduan UPM menjadi rebutan pasaran disebabkan kualiti pembelajarannya.

“Justeru, para pensyarah perlu mendidik graduan dengan dedikasi yang tinggi untuk memastikan kualiti graduan UPM memberi manfaat kepada masyarakat dan negara,” titah baginda pada hari pertama Majlis Konvokesyen UPM Ke-35 di Pusat Kebudayaan dan Kesenian Sultan Salahuddin Abdul Aziz Shah di sini.

Tuanju Canselor bertitah, untuk mencapai cita-cita itu UPM harus memfokuskan kepada kualiti pembelajaran dan pembangunan modal insan pelajar selain memantapkan penyelidikan yang membawa manfaat kepada masyarakat di sekeliling.



Baginda mahu melihat UPM menjadi universiti terunggul dalam pendidikan dan penyelidikan bukan sahaja di negara ini malah mampu bersaing dengan universiti-universiti lain bertaraf dunia.

Menariknya titah baginda, UPM berjaya menghasilkan bilangan graduan PhD melepasi tahap 350 orang dan secara tidak langsung membuktikan kecemerlangan UPM dalam penyeliaan dan pengurusan pengajian siswazah

Pada Majlis Konvokesyen kali ke-35 itu seramai 7,327 graduan menerima ijazah masing-

masing. Daripada jumlah itu 369 menerima ijazah Doktor falsafah (PhD), 1, 816 ijazah Master, 4,744 ijazah Bachelor dan 398 Diploma.



Turut hadir pada istiadat itu ialah tiga Pro-Canselor UPM, Tan Sri Dato' Setia Dr. Nayan Arifin, Tan Sri Dato' Sri Lim Ah Lek dan Tan Sri Dato' Rozali Ismail serta Pengerusi Lembaga Pengarah UPM, Tan Sri Dato' Dr. Syed Jalaluddin Syed Salim.

Pada istiadat yang sama, Tuanku Canselor turut mengingatkan semua graduan terus memberi sokongan dan sumbangan kepada UPM walaupun telah menamatkan pengajian untuk melestari graduan yang berkualiti.

Baginda bertitah, pelbagai cara boleh dilakukan oleh graduan dalam memberikan sokongan kepada universiti termasuk pemikiran, kewangan, bergiat aktif dalam alumni serta melalui program wakaf ilmu yang baharu sahaja dilancarkan oleh universiti.

Baginda turut menyeru warga UPM supaya sentiasa bersatu hati, mengutamakan integriti dan mempertingkatkan produktiviti dalam melonjakkan UPM ke tahap yang lebih tinggi.

Sultan Sharafuddin bertitah, universiti merupakan satu pusat pemikiran yang serius untuk menyumbang kepada kemajuan bangsa, negara dan sejagat dan bukannya tempat untuk memperjuangkan kepentingan diri sendiri atau partisan yang sempit.

"Kepentingan umum hendaklah mengatasi kepentingan peribadi. Para pensyarah dan cendekiawan di universiti boleh berlainan pandangan atau pendapat atau kritikan yang ikhlas dan membina.



"Bagaimanapun mereka hendaklah menghormati dan menyokong sesuatu keputusan yang

telah dibuat oleh majoriti. Hal ini akan dapat menyumbang kepada kemajuan UPM secara keseluruhan,” titah baginda.

Kepada pelajar-pelajar yang sedang mengikuti kursus di UPM pula, baginda mengingatkan agar menjaga tingkah laku dan sentiasa berfikiran waras dalam mempertimbangkan sindrom idealisme yang biasa menyerapi pelajar.

Sebarang ketidakpuasan hati terhadap Univesiti, hendaklah disampaikan dengan cara yang baik demi menjaga nama baik Universiti dan pelajar sendiri.

“Apa-apa bentuk tindakan yang bersifat vandalisme tidak mencerminkan budi pekerti dan integriti tinggi pelajar yang berada di gedung ilmu. Bahkan ia mengundang rasa kecewa ibu bapa dan masyarakat yang menaruh harapan tinggi terhadap para pelajar,” titah baginda.

Baginda turut memuji kejayaan UPM seperti menerajui bidang penyelidikan keselamatan makanan negara, pusat kecemerlangan tenaga hijau dan ‘Green Campus Community’, pengiktirafan sebagai Lead University for Aerospace Malaysia Innovation Center (AMIC) serta berbangga kepada pegawai akademik UPM yang berjaya memenangi Anugerah Akademik Negara 2010 baru-baru ini.



Sementara itu pada sesi kedua majlis pada sebelah petang, Tan Sri Dato' Setia Dr. Nayan Arifin dalam ucapannya menasihatkan graduan UPM mengamalkan integriti yang tinggi, mempunyai prinsip dan pegangan hidup yang jelas seperti yang diterapkan oleh UPM melalui pengisian modal insan dan kemahiran insaniah.

Beliau berkata, adalah sia-sia UPM menghasilkan graduan yang cemerlang dari sudut pencapaian akademiknya tetapi menyalahi etika moral dan agama.

“Jatuhnya empayar perniagaan seperti firma pelaburan Madoff, syarikat tenaga, komoditi dan perkhidmatan Enron Corporation dan sebagainya adalah disebabkan kekurangan aspek etika moral dan agama diberikan perhatian dalam membuat keputusan.

“Universiti merupakan landasan untuk memberi nilai tambah, bagi peningkatan kualiti dan martabat bangsa, dan merupakan medan penyelidikan serta percambahan idea yang menyumbang kepada pengukuhan masyarakat dan tamadun cemerlang.

Apa yang ingin dicorakkan oleh Universiti adalah pendidikan dengan ilmu yang memberi hikmah dan keberkatan mengamalkannya dengan jujur dan amanah,” katanya.

Berita ini disediakan oleh Pejabat Pemasaran Dan Komunikasi (MarComm), (Mohd Martin Kahar), Photo (Unit Photo MarComm).